

08/02/2003

`Umno lenyap jika ahli ketepikan kepentingan parti'

JITRA: Datuk Seri Dr Mahathir Mohamad berkata, Umno akan hilang sokongan, sekali gus mengalami nasib seperti parti pejuang kemerdekaan negara lain jika ahlinya membelakangkan kepentingan parti.

Pada masa yang sama, Perdana Menteri mengingatkan ahli Umno tidak terlalu angkuh ketika berurusan dengan kakitangan kerajaan sehingga menyebabkan parti kehilangan sokongan.

Katanya, banyak parti yang memperjuangkan kemerdekaan di negara lain sudah lenyap atau hilang sokongan apabila pemimpinnya meletakkan kepentingan peribadi melebihi perjuangan parti

"Kita boleh lihat di beberapa negara yang partinya pernah memperjuangkan kemerdekaan daripada British, Belanda dan Belgium yang kini hilang sokongan.

"Percayalah, Umno akan turut hancur jika kita terap budaya membelakangkan parti dan mementingkan diri sendiri

"Ada pemimpin yang beranggapan mereka adalah parti dan parti adalah mereka. Ini jelas sedikit sebanyak membawa perpecahan dalam Umno," katanya ketika merasmikan Unit Khas Pilihan Raya Pergerakan Puteri Umno, di Dewan Wawasan, di sini semalam.

Perdana Menteri juga menghadiri jamuan Tahun Baru Cina anjuran Barisan Nasional Kubang Pasu.

Dr Mahathir berkata, walaupun rakyat menghargai jasa Tunku Abdul Rahman, Tun Abdul Razak dan Tun Hussein Onn, namun mereka tidak akan berjaya tanpa sokongan parti.

Pada masa sama, beliau berharap Puteri Umno tidak menerap sikap ahli Umno dewasa yang sering bertelagah seperti yang berlaku ketika pertandingan merebut jawatan Ketua Puteri Umno, akhir tahun lalu.

"Seseorang pemimpin adalah baik sehingga waktu perebutan menjadi pemimpin. Ketika itulah timbul cerita kotor kononnya yang tidak baik mengenai seseorang itu. Ingatlah orang yang suka kotorkan orang lain, dia juga adalah kotor," katanya.

Perdana Menteri berkata, keangkuhan ahli Umno terhadap kakitangan kerajaan boleh menyebabkan parti kehilangan undi yang besar pada pilihan raya.

"Kalau kita bersikap demikian, kita akan kehilangan satu juta kakitangan kerajaan dan jika dikira mereka mempunyai seorang isteri dan seorang anak, secara purata kita akan hilang tiga juta undi," katanya.

Sementara itu, Dr Mahathir meminta pengundi Cina di Kubang Pasu terus memberikan sokongan kepada Barisan Nasional walaupun beliau tidak bertanding dalam pilihan raya umum akan datang.

Perdana Menteri berkata, jika pengundi Cina terus menyokong dan kerajaan yang kuat terus dikekalkan, segala dasar termasuk dasar berbaik-baik antara kaum yang ada dapat diteruskan.